

中華民國十八年六月一日

總理奉安宣傳叢刊之一

# 總理革命史略

蕭 贛 署

中國國民黨江西省黨務指導委員會宣傳部編印



# 總理遺像



## 總理遺囑

余致力國民革命，凡四十年，其目的在求中國之自由平等。積四十年之經驗，深知欲達到此目的，必須喚起民眾，及聯合世界上以平等待我之民族，共同奮鬥！

現在革命尚未成功，凡我同志，務須依照余所著：建國方略，建國大綱，三民主義，及第一次全國代表大會宣言，繼續努力，以求貫徹！最近主張開國民會議，及廢除不平等條約，尤須於最短期間，促其實現！是所至囑。

大 道 之 行  
天 下 為 公

孫文

博

愛

孫文

革命尚未成功  
同志仍須努力

孫文

孫  
理  
革  
命  
史  
略

目  
錄

總理遺像

總理遺囑

總理遺墨

自傳【有志竟成】

中國革命史略

附年譜

附著述及講演紀錄要目

史  
略  
目  
錄

## 有志竟成

夫事有順乎天理。應乎人情。適乎世界之潮流。合乎人羣之需要。而爲先知先覺者所決志行之。則斷無不成者也。此古今之革命維新興邦建國等事業是也。予之提倡共和革命於中國也。幸已達破壞之成功。而建設事業雖未就緒。然希望日佳。予敢信終必能達完全之目的也。故追述革命原起。以勵來者。且以自勉焉。夫自民國建元以來。各國文人學士之對於中國革命之著作。不下千數百種。類多道聽途說之辭。鮮能知革命之事實。而於革命之原起。更無從追述。故多有本於予之倫敦被難記第一章之革命事由。該章所述。本甚簡略。且於二十餘年之前。革命之成否。尙爲問題。而當時雖在英京。然亦事多忌諱。故尙未敢自承與中會爲予所創設者。又未敢表示與中會之本旨爲傾覆滿清者。今於此特修正之。以輔事實也。茲篇所述。皆就予三十年來所記憶之事實而追述之。由立志之日起至同盟成立之時。幾爲予一人之革命也。故事甚簡單。而於贊襄之要人。皆



能一一錄之無遺。自同盟會成立以後。則事體日繁。附和日衆。而海外熱心華僑。內地忠烈志士。各重要人物。不能一一畢錄於茲篇。當俟之修革命黨史時。乃能全爲補錄也。予自乙酉中法戰敗之年。始決傾覆清廷創建民國之志。由是以學堂爲鼓吹之地。借醫術爲入世之媒。十年如一日。當予肄業於廣州博濟醫學校也。於同學中物識有鄭士良號鞠臣者。其爲人豪俠尙義。廣交遊。所結納皆江湖之士。同學中無有類之者。予一見則奇之。稍與相習。則與之談革命。士良一聞而悅服。並告以被曾投入會黨。如他日有事。彼可爲我羅致會黨以聽指揮云。予在廣州學醫甫一年。聞香港有英文醫學校開設。予以其學課較優。而地較自由。可以鼓吹革命。故投香港學校肄業。數年之間。每於學課餘暇。皆致力於革命之鼓吹。常往來於香港澳門之間。大放厥辭。無所忌諱。時聞而附和者。在香港祇陳少白尤少紈楊鶴齡三人。而上海歸客則陸皓東而已。若其他之交遊。聞吾言者。不以爲大逆不道而避之。則以爲中風病狂相視也。予與陳尤楊三人常住香港。所夕往還。所談者莫不爲革命之言論。所懷者莫不爲革命之思想。所研究者莫不爲革命

之問題。四人相依甚密。非談革命則無以爲歡。數年如一日。故港澳間之戚友交遊。皆呼予等爲四大寇。此爲予革命言論之時代也。及予卒業之後。懸壺於澳門羊城兩地以問世。而實則爲革命運動之開始也。時鄭士良則結納會黨。聯絡防營。門徑旣通。端倪略備。予乃與陸皓東北遊京津。以窺清廷之虛實。深入武漢。以觀長江之形勢。至甲午中東戰起。以爲時機可乘。乃赴檀島美洲。創立興中會。欲糾合海外華僑以收臂助。不圖風氣未開。人心錮塞。在檀鼓吹數月。應者寥寥。僅得鄧蔭南與胞兄德彰二人。願傾家相助。及其他親友數十人之贊同而已。時適清兵屢敗。高麗旣失。旅威繼陷。京津亦岌岌可危。清廷之腐敗盡露。人心憤激。上海同志宋躍如乃函促歸國。美洲之行。因而中止。遂與鄧蔭南及三五同志返國以策進行。欲襲取廣州以爲根據。遂開乾亨行於香港爲幹部。設農學會於羊城爲機關。當時贊襄幹部事務者有鄧蔭南楊衢雲黃詠商陳少白等。而助運籌於羊城機關者。則陸皓東鄭士良並歐美技師及將校數人也。予則常往來廣州香港之間。慘淡經營。已過半載。籌備甚週。聲勢頗衆。本可一擊而生絕大之影響。乃以

運械不慎。致海關搜獲手槍六百餘桿。事機乃洩。而吾黨健將陸皓東殉焉。此爲中國有史以來爲共和革命而犧牲者之第一人。同時被株連而死者。則有丘四朱貴全二人。被捕者七十餘人。而廣東水師統帶程奎光與焉。後竟病死獄中。其餘之人或因或釋。此乙未九月九日。爲予第一次革命之失敗也。敗後三日。予尙在廣州城內。十餘日後。乃得間道脫險出至香港。隨與鄭士良陳少白同渡日本。略住橫濱。時予以返國無期。乃斷髮改裝。重遊檀島。而士良則歸國收拾餘衆。布置一切。以謀捲土重來。少白則獨留日本。以考察東邦國情。予乃介紹之於日友菅原傳。此友爲往日在檀所識者。後少白由彼介紹於曾根俊虎。由俊虎而識宮崎彌藏。卽宮崎寅藏之兄也。此爲革命黨與日本人士相交之始也。予到檀島後。復集合同志以推廣興中會。然已有舊同志以失敗而灰心者。亦有新聞道而赴義者。惟卒以風氣未開。進行遲滯。以久留檀島。無大可爲。遂決計赴美。以聯絡彼地華僑。蓋其衆比檀島多數倍也。行有日矣。一日散步市外。忽遇有馳車迎面而來者。乃吾師康德黎與其夫人也。吾遂一躍登車。彼夫婦不勝詫異。幾疑爲暴客。蓋吾

已改裝易服。彼不認識也。予乃曰。我孫逸仙也。遂相笑握手。問以何爲而至此。曰。回國道經此地。舟停而登岸流覽風光也。予乃趁車同游。爲之指導。游畢登舟。予乃告以予將作環繞地球之游。不日將由此赴美。將隨到英。相見不遠也。遂歡握而別。美洲華僑之風氣蔽塞。較檀島猶甚。故予由太平洋東岸之三藩市登陸。橫過美洲大陸。至大西洋西岸之紐約市。沿途所過之處。或留數日。或十數日。所至皆說以祖國危亡。清政腐敗。非從民族根本改革。無以救亡。而改革之任。人人有責。然而勸者諄諄。聽者終歸藐藐。其歡迎革命主義者。每埠不過數人或十餘人而已。然美洲各地華僑多立有洪門會館。洪門者。創設於明朝遺老。起於康熙時代。蓋康熙以前。明朝之忠臣烈士。多欲力圖恢復。誓不臣清。捨生赴義。屢起屢蹶。與虜拚命。然卒不救明朝之亡。迨至康熙之世。清勢已盛。而明朝之忠烈亦死亡殆盡。二三遺老。見大勢已去。無可挽回。乃欲以民族主義之根苗。流傳後代。故以反清復明之宗旨。結爲團體。以待後有起者。可藉爲資助也。此殆洪門創設之本意也。然其事必當極爲祕密。乃可防政府之察覺也。夫政

府之爪牙爲官吏。而官吏之耳目爲士紳。故凡所謂士大夫之類。皆所當忌而須嚴爲杜絕者。然後其根株乃能保存。而潛滋暗長於異族專制政府之下。以此條件而立會。將以何道而後可。必也以最合羣衆心理之事跡。而傳民族國家之思想。故洪門之拜會。則以演戲爲之。蓋此最易動羣衆之視聽也。其傳布思想。則以不平之心。復仇之事導之。此最易發常人之感情也。其口號暗語。則以鄙俚粗俗之言以表之。此最易使士大夫聞而生厭遠而避之者也。其固結團體。則以博愛施之。使彼此手足相顧。患難相扶。此最合夫江湖旅客無家游子之需要也。而最終乃傳以民族主義。以期達其反清復明之目的焉。國內之會黨。常有與官吏衝突。故猶不忘其與清政府居於反對之地位。而反清復明之口頭語。尙多了解其義者。而海外之會黨多處於他國自由政府之下。其結會之需要。不過爲手足患難之聯絡而已。政治之意味殆全失矣。故反清復明之口語。亦多有不知其義者。當予之在美洲鼓吹革命也。洪門之人。初亦不明吾旨。予乃反而叩之反清復明何爲者。彼衆多不能答也。後由美之革命同志鼓吹數年。而洪門之衆乃始知彼等原爲民族老革黨也。

。然當時予之遊美洲也。不過爲初期之播種。實無大影響於革命前途也。然已大觸清廷之忌矣。故於甫抵倫敦之時。卽遭使館之陷。幾致不測。幸得吾師康德黎竭力營救。始能脫險。此則檀島之邂逅。真有天幸焉。否則吾尙無由知彼之歸國。彼亦無由知吾之來倫敦也。倫敦脫險後。則暫留歐洲。以實行考察其政治風俗。並結交其朝野賢豪。兩年之中。所見所聞。殊多心得。始知徒致國家富強。民權發達。如歐洲列強者猶未能登斯民於極樂之鄉也。是以歐洲志士。猶有社會革命之運動也。予欲爲一勞永逸之計。乃採取民生主義。以與民族民權問題。同時解決。此三民主義之主張所由完成也。時歐洲尙無留學生。又鮮華僑。雖欲爲革命之鼓吹。其道無由。然吾生平所志。以革命爲唯一之天職。故不欲久處歐洲。曠廢革命之時日。遂往日本。以其地與中國相近。消息易通。便於籌畫也。抵日本後。其民黨領袖犬養毅遣宮崎寅藏平山周二人來橫濱歡迎。乃引至東京相會。一見如舊識。抵掌談天下事。甚痛快也。時日本民黨初握政權。大隈爲外相。犬養爲之運籌。能左右之。後由犬養介紹。曾一見大隈大石尾崎等。此爲予與日本政

界人物交際之始也。隨而識副島種臣及其在野之志士如頭山平岡秋山中野鈴木等。後又識安川犬塚久原等。各志士之對於中國革命事業。先後多有資助。尤以久原太塚爲最。其爲革命奔走始終不懈者。則有山田兄弟宮崎兄弟菊池萱野等。其爲革命盡力者。則有副島寺尾兩博士。此就其直接於予者而略記之。以誌不忘耳。其他間接爲中國革命黨奔走盡力者尙多。不能於此一悉記。當俟之革命黨史也。日本有華僑萬餘人。然其風氣之銅塞。聞革命而生畏者。則與他處華僑無異也。吾黨同人有往返於橫濱神戶之間。鼓吹革命主義者。數年之中而慕義來歸者。不過百數十人而已。以日本華僑之數較之。不及百分之一也。向海外華僑之傳播革命主義也。其難固已如此。而欲向內地以傳布。其難更可知矣。內地之人。其聞革命排滿之言而不以爲怪者。只有會黨中人耳。然彼衆皆知識薄弱。團體散漫。憑藉全無。只能望之爲響應。而不能用爲原動力也。由乙未初敗以至於庚子。此五年之間。實爲革命進行最艱難困苦之時代也。蓋予旣遭失敗。則國內之根據。個人之事業。活動之地位。與夫十餘年來所建立之革命基礎。皆完全消滅。而

海外之鼓吹。又毫無效果。適於其時有保皇黨發生。爲虎作倂。其反對革命。反對共和。比之清廷爲尤甚。當此之時。革命前途。黑暗無似。希望幾絕。而同志尙不盡灰心者。蓋正朝氣初發時代也。時予乃命陳少白回香港。創辦中國報。以鼓吹革命。命史堅如入長江。以聯絡會黨。命鄭士良在香港設立機關。招待會黨。於是乃有長江會黨及兩廣福建會黨并合於興中會之事也。旋遇清廷有排外之舉。假拳黨以自衛。有殺洋人圍使館之事發生。因而八國聯軍之禍起矣。予以時機不可失。乃命鄭士良入惠州。招集同志以謀發動。而命史堅如入羊城。招集同志以謀響應。籌備將竣。予乃與外國軍官數人繞道至香港。希圖從此潛入內地。親率健兒。組織一有秩序之革命軍。以救危亡也。不期中途爲奸人告密。船一抵港。卽被香港政府監視。不得登岸。遂致原定計畫不得施行。乃將惠州發動之責。委之鄭士良。而命楊衢雲李紀堂陳少白等在香港爲之接濟。予則折回日本轉渡臺灣。擬由臺灣設法潛渡內地。時臺灣總督兒玉頗贊中國之革命。以北方已陷於無政府之狀態也。乃飭民政長官後藤與予接洽。許以起事之後。可以相助。予於是一



而擴充原有計畫。就地加聘軍官。蓋當時民黨尙無新知識之軍人也。而一面令士良即日發動。並改原定計畫。不直逼省城。而先占領沿海一帶地點。多集黨衆。以候子來乃進行攻取。士良得令。即日入內地。親率已集合於三洲田之衆。出而攻撲新安深圳之清兵。盡奪其械。隨而轉戰於龍岡淡水永湖梁化白芒花三多祝等處。所向皆捷。清兵無敢當其鋒者。遂占領新安大鵬至惠州平海一帶沿海之地。以待子與幹部人員之入。及武器之接濟。不圖惠州義師發動旬日。而日本政府忽而更換。新內閣總理伊藤氏。對中國方針。與前內閣大異。乃禁制臺灣總督不許與中國革命黨接洽。又禁武器出口及禁日本軍官投效革命軍者。而予潛渡之計畫。乃爲破壞。遂遣山田良政與同志數人往鄭營報告一切情形。並令之相機便宜行事。山田等到鄭士良軍中時。已在起事之後三十餘日矣。士良連戰月餘。彈藥已盡。而集合之衆已有萬餘人。渴望幹部軍官及武器之至甚切。而忽得山田所報消息。遂立令解散。而率其原有之數百人間道出香港。山田後以失路爲清兵所擒被害。惜哉。此爲外國義士爲中國共和犧牲者之第一人。當鄭士良之在惠州苦戰也

。史堅如在廣州屢謀響應。皆不得當。遂決意自行用炸藥攻燬兩廣總督德壽之署而殲之。炸發不中。而史堅如被擒遇害。是爲共和殉難之第二健將也。堅如聰明好學。真摯懇誠。與陸皓東相若。其才貌英姿。亦與皓東相若。而二人皆能詩能畫亦相若。皓東沉勇。堅如果毅。皆命世之英才。惜皆以事敗而犧牲。元良沮喪。國士淪亡。誠革命前途之大不幸也。而二人死節之烈。皓氣英風。實足爲後死者之模範。每一念及。仰止無窮。二公雖死。其精靈之縈繞吾懷者。無日或間也。庚子之役。爲予第二次革命之失敗也。經此失敗而後。回顧中國之人心。已覺與前有別矣。當初次之失敗也。舉國輿論莫不目予輩爲亂臣賊子大逆不道。咒詛謾罵之聲不絕於耳。吾人足跡所到。凡認識者。幾視爲毒蛇猛獸。而莫敢與吾人交遊也。惟庚子失敗之後。則鮮聞一般人之惡聲相加。而有識之士。且多爲吾人扼腕歎惜。恨其事之不成矣。前後相較。差若天淵。吾人睹此情形。中心快慰。不可言狀。知國人之迷夢已有漸醒之兆。加以八國聯軍之破北京。清后帝之出走。議和之賠款九萬萬兩而後。則清廷之威信已掃地無餘。而人民之生計從此日蹙。

國勢危急。有岌岌不可終日。有志之士。多起救國之思。而革命風潮自此萌芽矣。時適各省派留學生至日本之初。而起東求學之士。類多頭腦新潔。志氣不凡。對於革命理想。感受極速。轉瞬成爲風氣。故其時東京留學界之思想言論。皆集中於革命問題。劉成禺在學生新年會大演說革命排滿。被清公使逐出學校。而戢元成沈虬齋張溥泉等則發起國民報。以鼓吹革命。留東學生提倡於先。內地學生附和於後。各省風潮。從此漸作。在上海則有章太炎吳稚暉鄒容等借蘇報及鼓吹革命。爲清廷所控。太炎鄒容被拘囚租界監獄。吳亡命歐洲。此案涉及清帝個人。爲朝廷與人民聚訟之始。清朝以來所未有也。清廷雖訟勝。而章鄒不過僅得囚禁兩年而已。於是民氣爲之大壯。鄒容著有革命軍一書。爲排滿最激烈之言論。華僑極爲歡迎。其開導華僑風氣。爲力甚大。此則革命風潮初盛時代也。壬寅癸卯之交。安南總督韜美氏託東京法公使屢次招予往見。以事未能成行。後以河內開博覽會。因往一行。到安南時。適韜美已離任回國。囑其祕書長哈德安招待甚殷。在河內時。識有華商黃龍生甄吉亭甄璧楊壽彭曾齊等。後結爲同志。於欽廉河

口等役。盡力甚多。河內博覽會告終之後。予再作環球漫游。取道日本檀島而赴歐美。過日本時。有廖仲愷夫婦馬君武胡毅生黎仲實等多人來會。表示贊成革命。予乃託以在東物識有志學生。結爲團體。以任國事。後同盟會之成立。多有力焉。自惠州失敗以至同盟會成立之間。其受革命風潮所感興起而圖舉義者。在粵則有李紀堂洪全福之事。在湘則有黃克強馬福益之事。其事雖不成。人多壯之。海外華僑亦漸受東京留學界及內地革命風潮之影響。故予此次漫游所到。凡有華僑之處。莫不表示歡迎。較之往昔大不同矣。乙巳春間。予重至歐洲。則其地之留學生已多數贊成革命。蓋彼輩皆新從內地或日本來歐。近一二年已深受革命思潮之陶冶。已漸由言論而達至實行矣。予於是乃揭櫫吾生平所懷抱之三民主義五權憲法以號召之。而組織革命團體焉。於是開第一會於北京。加盟者三十餘人。開第二會於柏林。加盟者二十餘人。開第三會於巴黎。加盟者亦十餘人。開第四會於東京。加盟者數百人。中國十七省之人皆與焉。惟甘肅尙無留學生到日本。故闕之也。此爲革命同盟會成立之始。因當時尙多諱言革命二字。故祇以同盟會見

稱。後亦以此名著焉。自革命成立之後。予之希望則爲之開一新紀元。蓋前此雖身當百難之衝。爲舉世所非笑唾罵。一敗再敗。而猶冒險猛進者。仍未敢望革命排滿事業能及吾身而成者也。其所以百折不回者。不過欲有以振起既死之人心。昭蘇將盡之國魂。期有繼我起者成之耳。及乙巳之秋。集合全國之英俊而成立革命同盟會於東京之日。吾始信革命大業可及身而成矣。於是乃敢定立中華民國之名稱。而公布於黨員。使之各回本省。鼓吹革命主義。而傳布中華民國之思想焉。不期年而加盟者已逾萬人。支部則亦先後成立於各省。從此革命風潮一日千丈。其進步之速。有出人意表者矣。當時外國政府之對於中國革命黨。亦多刮目相看。一日予從南洋往日本。船泊吳淞。有法國武官布加卑者奉其陸軍大臣之命來見。傳達彼政府有贊助中國革命事業之好意。叩予革命之勢力如何。予略告以實情。又叩以各省軍隊之聯絡如何。若已成熟。則吾國政府立可相助。予答以未有把握。遂請彼派員相助。以辦調查聯絡之事。彼乃於駐紮天津之參謀部。派定武官七人。歸予調遣。予命廖仲愷往天津設立機關。命黎仲實與某武官調查兩廣。命

胡毅生與某武官調查川滇。命喬宜齋與某武官往南京武漢。時南京武昌兩處新軍皆大歡迎。在南京有趙伯先接洽。約同營長以上各官相見。祕密會議。策劃進行。而武昌則有劉家運接洽。約同同志之軍人在教會之日知會開會。到會者甚衆。聞新軍鎮統張彪亦改裝潛入。開會時各人演說。大倡革命。而法國武官亦演說贊成。事遂不能祕密。而湖廣總督張之洞乃派洋關員某國人尾法武官之行蹤。途上與之訂交。亦僞爲表同情於中國革命者也。法官以彼亦西人。不之疑也。故內容多爲彼探悉。張之洞遂奏報其事於清廷。其中所言革命黨之計劃。或確或否。清廷得報。乃大與法使交涉。法使本不知情也。乃請命於政府何以處分布加卑等。政府飭彼勿問。清廷亦無如之何。未幾法國政府變更。而新內閣不贊成是舉。遂將布加卑等撤退回國。後劉家運等則以關於此事被逮而犧牲也。此革命運動之起國際交涉者也。同盟成立未久。發刊民報。鼓吹三民主義。遂使革命思潮瀰漫全國。自有雜誌以來。可謂成功最著者。其時慕義之士。聞風興起。當仁不讓。獨樹一幟以建義者。踵相接也。其最著者。如徐錫麟熊成基秋瑾等是也。丙午萍醴之

役。則同盟會會員自動之義師也。當萍醴革命與清兵苦戰之時。東京之會員莫不激昂慷慨。怒髮衝冠。亟思飛渡內地。身臨前敵。與虜拚命。每日到機關部請命投軍者甚衆。稍有緩却。則多痛哭流淚。以爲求死而不可得。苦莫甚焉。其雄心義憤。良足嘉尙。獨惜萍鄉一舉。爲會員之自動。本部於事前一無所知。故臨時無所備。然而會員之紛紛回國從軍者。已相望於道矣。尋而萍醴之師敗。而禹之謨劉道一甯調元胡英等竟被清吏拿獲。或因或殺者多人。此爲革命同盟會會員第一次之流血也。由此而後。則革命風潮之鼓盪全國者。更爲從前所未有。而同盟會本部之在東。亦不能久爲沉默矣。時清廷亦大起恐慌。屢向日本政府交涉。將予逐出日本境外。予乃離日本而與漢民精衛二人同行而之安南。設機關部於河內。以籌劃進行。旋發動潮州黃岡之師不得利。此爲予第三次之失敗也。繼又命鄧子瑜發難於惠州。亦不利。此爲予第四次之失敗也。時適欽廉兩府有抗捐之事發生。清吏派郭人漳趙伯先二人各帶新軍三四千人往平之。予乃命黃克強隨郭人漳營。命胡毅生隨趙伯先營。而遊說之。以贊成革命。二人皆首肯。許以若有堂堂

正正之革命軍起。彼等必反戈相應。於是一面派人往約欽廉各屬紳士鄉團爲一致行動。一面派萱野長知帶款回日本購械。並在安南召集同志。並聘就法國退伍軍官多人。擬器械一到。則占據防城至東興一帶沿海之地。爲組織軍隊之用。東興與法屬之芒街。僅隔一河。有橋可達。交通甚爲便利也。滿擬武器一到。則吾黨可成正式軍隊二千餘人。然後集合欽州各鄉團勇六七千人。而後要約郭人漳趙伯先二人所帶之新軍約六千餘人。便可成一聲勢甚大之軍隊。再加以訓練。當成精銳。則兩廣可收入掌握之中。而後出長江以合南京武昌之新軍。則破竹之勢可成。而革命可收完全之效果矣。乃不期東京本部之黨員忽起風潮。而武器購買運輸之計劃爲之破壞，至時防城已破。武器不來。予不特失信於接收軍火之同志。並失信於團紳矣。而攻防城之同志至時不見武器之來。乃轉而逼欽州。冀郭軍之響應。郭見我軍之薄弱。加以他軍爲之制。故不敢來。諸軍遂進圍靈山。冀趙軍之響應。趙見郭尙未來。彼亦不敢來。我軍以力薄難進。遂退入十萬大山。此爲予第五次之失敗也。欽廉計劃不成之後。予乃親率黃克強胡漢民並法國軍官與安南同



志百數十人襲取鎮南關。佔領三要塞。收其降卒。擬由此集合十萬大山之衆。而會攻龍州。不圖十萬大山之衆。以道遠不能至。遂以百餘衆握據三砲台。而與龍濟光陸榮廷等數千之衆連戰七晝夜。乃退入安南。予過諒山時爲清偵探所察悉。報告清吏。後清廷與法國政府交涉。將予放逐出安南。此爲予第六次之失敗也。予於離河內之際。一面令黃克強籌備再入欽廉。以圖集合該地同志。一面令黃明堂窺取河口。以圖進取雲南。以爲吾黨根據之地。後克強乃以二百餘人出安南。橫行於欽廉上思一帶。轉戰數月所向無前。敵人聞而生畏。克強之威名因以大著。後以彈盡援絕而退出。此爲予第七次之失敗也。予抵星洲數月之後。黃明堂乃以百數十人襲得河口。誅邊防督辦。收其降衆千有餘人。守之以待幹部人員前往指揮。時予遠在南洋。又不能再過法境。故難以親臨前敵以指揮之。乃電令黃克強前往指揮。不期克強行至半途。被法官疑爲日本人。遂截留之而送之回河內。爲清吏所悉。與法政府交涉。乃解之出境。而河口之衆。以指揮無人。失機進取。否則蒙自必爲我有。而雲南府亦必無抵抗之力。觀當時雲貴總督錫良求救之電。

其倉皇失措可知也。黃明堂守候月餘。人自爲戰。散漫無紀。而虜四集。其數約十倍於我新集之衆。河口遂不守。而明堂率衆六百餘人退入安南。此爲予第八次之失敗也。後黨人由法政府遣送出境。而往英屬星加坡。到埠之日。爲英官阻難。不准登岸。駐星法領事乃與星督交涉。稱此六百餘衆。乃在河口戰敗而退入法境之革命軍。法屬政府以彼等自願來星。故送之至此云云。星督答以中國人民而與其本國政府作戰。而未得他國承認爲交戰團體者。本政府不能視爲國事犯。而祇視爲亂民。亂民入境。有違本政府之禁例。故不准登岸。而法國郵船停泊岸邊兩日。後由法屬政府表白。當河口革命戰爭之際。法政府對於兩方曾取中立態度。在事實上直等於承認革命之交戰團體也。故送來星加坡之黨人。不能作亂民看待等語。星政府乃准登岸。此革命失敗之後所發生之國際問題也。由黃岡至河口等役。乃同盟會幹部由予直接發動。先後六次失敗。經此六次之失敗。精衛頗爲失望。遂糾合同志數人入北京。與虜會拚命。一擊不中。與黃復生同時被執繫獄。至武昌起後乃釋之。同盟會成立之前。其出資以助義軍者。不過予之親友中少數

人耳。此外則無人敢助。亦無人肯助也。自同盟會成立後。始有向外籌資之舉矣。當時出資最勇而多者。張靜江也。傾其巴黎之店所得六七萬元盡以助餉。其出資勇而學者。安南提岸之黃景南也。傾其一生之蓄積數千元。盡獻之軍用。誠難能可貴也。其他則有安南西貢之巨商李卓峯曾錫周馬培生等三人。曾各出資數萬。亦當時之未易多見者。予自連遭失敗之後。安南日本香港等地與中國密邇者。皆不能自由居處。則予對於中國之活動地盤已完全失却矣。於是將國內一切計劃。委託於黃克強胡漢民二人。而予乃再作漫游。專任籌款。以接濟革命之進行。後克強漢民回香港設南方統籌機關。與趙伯先倪典映朱執信陳炯明姚雨平等謀。以廣州新軍舉事。運動既熟。擬於庚戌年正月某日發難。乃新軍中有熱度過甚之士。先一日因小事生起風潮。於是倪典映倉卒入營。親率一部分從沙河進攻省城。至橫枝岡爲敵截擊。映典中彈被擒死。軍中無主。遂以潰散。此吾黨第九次之失敗也。時予適從美東行。至三藩市。聞敗而後則取道檀島日本而回東方。過日本時。曾潛行登陸。隨爲警察探悉。不准留居。遂由橫濱渡檳榔嶼。約伯先克強漢

民等來會。以商捲土重來之計劃。時各同志以新敗之餘。破壞最精銳之機關。失却最利便之地盤。加之新軍同志亡命南來者。實繁有徒。招待安插。爲力已窮。而吾人住食行動之資。將虞不繼。舉目前途。衆有憂色。詢及將來計劃。莫不唏噓太息。相視無言。予乃慰以一敗何足餒。吾曩之失敗。幾爲舉世所棄。比之今日。其困難實百倍。今日吾輩雖窮。而革命之風潮已盛。華僑之思想已開。從今而後。只慮吾人之無計劃。無勇氣耳。如果衆志不衰。則財用一層。予當力任設法。時各人親見濱城同志之窮。吾等亡命境地之困。日常之費。每有不給。顧安得餘資以爲活動。予再三言必可設法。伯先乃言如果欲再舉。必當立速遣人攜資數千金回國。以接濟某處之同志。免彼散去。然後圖集合而再設機關以謀進行。吾等亦當繼續回香港與各方接洽。如是日內卽需川資五千元。如事有可爲。則又非數十萬大款不可。予乃招集當地華僑同志會議。勗以大義。一夕之間。則贖資八千有奇。再令各同志擔任到各埠分頭勸募。數日之內。已達五六萬元。而遠地更所不計。既有頭批的款。已可分頭進行。計劃既定。予本擬遍游南洋英荷各屬。

乃荷屬則拒絕不許予往。而英屬及暹邏亦先後逐予出境。如是則東亞大陸之廣。南洋島嶼之多。竟無寸土爲予立足之地。予遂不得不遠赴歐美矣。到美之日。遍游各地。勸華僑捐資以助革命。則多有樂從者矣。於是乃有辛亥三月二十九廣州之舉。是役也。集各省革命黨之精英。與彼虜爲最後之一博。事雖不成。而黃花岡七十二烈士轟轟烈烈之概。已震動全球。而國內革命之時勢。實以之造成矣。此爲吾黨第十次之失敗也。先是陳英士宋鈍初譚石屏居覺生等既受香港軍事機關之約束。謀爲廣州應援。廣州旣一敗再敗。乃轉謀武漢。武漢新軍。自予派法國武官聯絡之後。革命思想。日日進步。早已成熟。無如清吏防範。亦日以加嚴。而端方調兵入川。湖廣總督瑞澂則以最富於革命思想之一部分交端方調遣。所以然者。蓋欲弭患於未然也。然自廣州一役之後。各省已風聲鶴唳。草木皆兵。而清吏皆盡入恐慌之地。而尤以武昌爲甚。故瑞澂先與某國領事相約。請彼調兵船入武漢。倘有革命黨起事。則開砲轟轟。時已一日數驚。而孫武劉公等積極進行。而軍中亦躍躍欲動。忽而機關破壞。拿獲三十餘人。時胡英尙在武昌獄中。聞耗

。即設法止陳英士等勿來。而砲兵與工程等營兵士已多投入革命黨者。聞彼等各冊已被搜獲。明日則必拿人等語。於是迫不及待。爲自存計。熊秉坤首先開槍發難。而蔡濟民等率衆進攻。開砲轟擊督署。瑞澂聞砲。立逃漢口。請某領事如約開砲轟轟。以庚子條約。一國不能自由行動。乃開領事團會議。初意欲得多數表決。卽行開砲攻擊以平之。各國領事對於此事。皆無成見。惟法國領事羅氏，乃予舊交。深悉革命內容。時武昌之起事第一日。則揭獲吾名。稱予命令而發難者。法領事於會議席上。乃力言孫逸仙派之革命黨。乃以改良政治爲目的。決非無意識之暴舉。不能以義和團一例看待而加干涉也。時領袖領事爲俄國。俄領事與法領事同取一致之態度。於是各國多贊成之。乃決定不加干涉，而並出宣布中立之布告。瑞澂見某領事失約。無所倚恃。乃逃上海。總督一逃。而張彪亦走。清朝方面。已失其統馭之權。秩序大亂矣。然革命黨方面。孫武以造炸藥誤傷未愈。劉公謙讓未遑。上海人員又不能到。於是同盟會員蔡濟民張振武等。乃迫黎元洪出而担任湖北都督。然後秩序漸復。厥後黃克強等乃到。此時湘鄂之見已萌。而

號令已不能統一矣。按武昌之成功。乃成於意外。其主因則在瑞澂一逃。倘瑞澂不逃。則張彪斷不走。而彼之統馭必不失秩序必不亂也。以當時武昌之新軍。其贊成革命者之大部分。已由端方調往四川。其尙留武昌者。只砲兵及工程營之小部分耳。其他留武昌之新軍。尙屬毫無成見者也。乃此小部分以機關破壞而自危。決冒險以圖功。成敗在所不計。初不意一擊而中也。此殆天心助漢而亡胡者歟。武昌既稍能久支。則所欲救武漢而促革命之成功者。不在武漢之一省。而在各省之響應也。吾黨之士。皆能見及此。故不約而同。各自爲戰。不數月而十五省皆光復矣。時響應之最有力而影響於全國最大者。厥爲上海。陳英士在此積極進行。故漢口一失。英士則能取上海以抵之。由上海乃能窺取南京。後漢陽一失。吾黨又得南京以抵之。革命之大局因以益振。則上海英士一木之支者。較他着尤多也。武昌起義之次夕。予適行抵美國哥羅拉多省之典華城。十餘日前。在途中已接到黃克強在香港發來一電。因行李先運送至此地。而密碼則置於其中。故途上無由譯之。是夕抵埠。乃由行李檢出密碼。而譯克強之電。其文曰。居正從武

昌到港。報告新軍必動。請速匯款應急等語。時予在典華。思無法可得款。隨欲擬電復之令勿動。惟時已入夜。予終日在車中體倦神疲。思慮紛亂。乃止。欲於明朝睡醒精神清爽時再詳思審度。而後覆之。乃一睡至翌日午前十一時。起後覺飢。先至飯堂用膳。道經迴廊報館。便購一報攜入飯堂閱看。坐下一展報紙。則見電報一段曰。武昌爲革命黨占領。如是我心中躊躇未決之覆電。已爲之冰釋矣。乃擬電致克強。申說覆電延遲之由。及予以後之行蹤。遂起程赴美京。時予本可由太平洋潛回。則二十餘日可到上海。親與革命之戰。以快生平。乃以此時吾當盡力於革命事業者。不在疆場之上。而在樽俎之間。所得效力爲更大也。故決意先從外交方面致力。俟此問題解決而後回國。按當時各國情形。美國政府對於中國則取門戶開放機會均等領土保全。而對於革命則尙無成見。而美國輿論則大表同情於我。法國則政府民間之對於革命皆有好意。英國則民間多表同情。而政府之對中國政策。則爲日本之馬首是瞻。德俄兩國當時之趨勢。則多傾向於清政府。而吾黨之與彼政府民間皆尙少交際。故其政策無法轉移。惟日本則與中國最密



切。而其民間志士不獨表同情於我。且尙有捨身出力以助革命者。惟其政府之方針實在不可測。按之往事。彼曾一次逐予出境。一次拒我之登陸。則其對於中國之革命事業可知。但以庚子條約之後。彼一國不能在中國單獨自由行動。要而言之。列強之與中國最有關係者有六焉。美法二國則當表同情革命者也。德俄二國。則當反對革命者也。日本則民間表同情而其政府反對者也。英國則民間同情而其政府未定者也。是故吾之外交關鍵。可以舉足輕重爲我成敗存亡所係者。厥爲英國。倘英國右我。則日本不能爲患矣。予於是乃起程赴紐約。覓船渡英。道過聖易路城時。購報讀之。則有武昌革命軍爲奉孫逸仙命令而起者。擬建共和國體。其首任總統當屬之孫逸仙云云。予得此報。於途中格外慎密。避却一切報館訪員。蓋惡虛聲而圖實際也。過芝加古時。則帶同志朱卓文一同赴英。抵紐約時。聞粵中同志圖粵急。城將下。予以欲免流血計。乃致電兩廣總督張鳴岐。勸之獻城歸降。而命同志全其性命。後此目的果達。到英國時。由美人同志咸馬里代約四國銀行團主任會談磋商停止清廷借款之事。先清廷與四國銀行團結約訂有川漢鐵

路借款一萬萬元。又幣制借款一萬萬元。此兩宗借款。一則已發行債票。收款存備待付者。一則已簽約而未發行債票者。予之意則欲銀行團於已備之款停止交付。於未備之款停止發行債票。乃銀行主幹答以對於中國借款之進止。悉由外務大臣主持。此事本主幹當惟外務大臣之命是聽。不能自由作主也云云。予於是乃委託維加砲廠總理爲予代表往與外務大臣磋商。向英政府要求三事。一止絕清廷一切借款。二制止日本援助清廷。三取消各處英屬政府之放逐令。以便予取道回國。三事皆得英政府允許。予乃再與銀行團主任開商革命政府借款之事。該主幹曰。我政府既允君之請而停止吾人借款清廷。則此後銀行團借款與中國。只有與新政府交涉耳。然必君回中國成立正式政府之後乃能開議也。本團今擬派某行長與君同行歸國。如正式政府成立之日。就近與之磋商可也。時以予在英國個人所能盡之義務已盡於此矣。乃取道法國而東歸。過巴黎。曾往見其朝野之士。皆極表同情於我。而尤以現任首相。格利門梳爲最懇摯。予離法國三十餘日。始達上海。時南北和議已開。國體猶尙未定也。當予未到上海之前。中外各報皆多傳布謂予

帶有巨款回國。以助革命軍。予甫抵上海之日。同志之所望我者以此。中外各報館訪員之所問者亦以此。予答之曰。予不名一錢也。所帶回者革命之精神耳。革命之目的不達。無和議之可言也。於是各省代表乃開選舉會於南京。選舉予爲臨時總統。予於基督降生一千九百十二年正月一日就職。乃申令頒布定國號爲中華民國。改元陽歷。以是年爲中華民國元年。於是予三十年如一日之恢復中華，創立民國之志。於斯竟成。

## 中國革命史

余自乙酉中法戰後。始有志於革命。乙未遂舉事於廣州。辛亥而民國告成。然至於今日。革命之役。猶未竣也。余之從事革命。蓋已三十有七年於茲。賅括本末。臚列事實。自有待於革命史。今絜綱要述之如左。

### 一 革命之主義

革命之名詞。創於孔子。中國歷史。湯武以後。革命之事實。已數見不鮮矣。其在歐洲

則十七八世紀以後。革命風潮。遂磅礴於世界。不獨民主國惟然。則君主國之所以有立憲。亦革命之所賜也。余之謀中國革命。其所持主義。有因襲吾國固有之思想。有規撫歐洲之學說事蹟者。有吾所獨見而創獲者。分述於左。

一。民族主義 觀中國歷史之所示。則知中國之民族。有獨立之性與能力。其與他民族相遇。或和平而相安。或狎習而與之同化。其在政治不修及軍事廢弛之時。雖不免暫受他民族之蹂躪與宰制。然率能以力勝之。觀於蒙古宰制中國垂一百年。明太祖終能率天下豪傑。以光復宗國。則知滿洲宰制中國。則中國人必終能驅除之。蓋民族思想。實吾先民所遺留。初無待於外鑠者也。余之民族主義。特就先民所遺留者。發揮而光大之。且改良其缺點。對於滿洲。不以復仇爲事而務與之平等共處於中國之內。此爲以民族主義和國內諸民族也。對於世界諸民族。務保持吾民族之獨立地位。發揚吾固有之文化。且吸世界之文化而光大之。以期與諸民族並驅於世界。以馴致於大同。此爲以民族主義對世界之諸民族也。

二。民權主義 中國古昔有唐虞之揖讓。湯武之革命。其垂爲學說者。有所謂天視自我民視。天聽自我民聽。有所謂聞誅一夫紂未聞弑君。有所謂民爲貴君爲輕。此不可謂無民權思想矣。然有其思想而無其制度。故以民立國之制。不可取資歐美。歐美諸國有行民主立憲者。有行君主立憲者。其在民主立憲無論矣。卽在君主立憲。亦爲民權漲進君權退縮之結果。不過君主遺蹟。猶未剷絕耳。余之從事革命。以中國非民主不可。其理有三。旣知民爲邦本。一國之內人人平等。君主何復有存在之餘地。爲此自學理言之者也。滿洲之入據中國。使中國民族處於被征服之地位。國民之痛。二百六十餘年如一日。故君主立憲在他國君民無甚深之惡感者。獨或可暫安於一時。在中國則必不能行。此自歷史事實而言之者也。中國歷史上之革命。其混亂時間所以延長者。皆由人各欲帝制自爲。遂相爭相奪而不已。行民主之制。則爭自絕。此自將來建設而言之者也。有此三者。故余之民權主義。第一決定者爲民主。而第二之決定。則以爲民主專制必不可行。必立憲而後可以圖治。歐洲立憲之精義。發於孟德斯鳩。所謂立法。司法。行政。三權

分立是已。歐洲立憲之國。莫不行之。然余遊歐美深究其政治法律之得失。如選舉之弊。決不可無以救之。而中國相傳考試之制。糾察之制。實有其精義。足以濟歐美政治法律之窮。故主張以考試糾察二權。與立法司法行政之權並立。合爲五權憲法。更採直接民權之制。以現主權在民之實。如是余之民權主義。遂圓滿而無憾。

三。民生主義 歐美自機器發明。而貧富不均之現象。隨以呈露。橫流所激。經濟革命之燄。乃較政治革命爲尤烈。此在吾國三十年前。國人鮮一顧及者。余遊歐美。見其經濟岌岌危殆之狀。彼都人士。方焦頭爛額而莫知所救。因念吾國經濟組織。持較歐美。雖貧富不均之現象無是劇烈。然特分量之差。初非性質之殊也。且他日歐美經濟之影響及於我國。則此種現象。必日與俱增。故不可不爲綢繆未雨之計。由是參綜社會諸家學說。比較其得失。覺國家產業主義。尤深穩而可行。且歐美行之而焦頭爛額者。吾國行之實爲典突徙薪。故決定以民生主義與民族主義民權主義同時並行。將一舉而成政治之功。兼以塞經濟革命之源也。

綜上所說。則知余之革命主義內容。賅括言之。三民主義。五權憲法是已。苟明夫世界之趨勢。與中國之情狀者。則余之主張。實行必要而且可行也。

## 二 革命之方略

專制時代。人民之精神與身體。皆受桎梏。而不能解放。故號有爲國民利害着想。獻身以謀革命者。國民不惟不知助之。且從而非笑與漠視之。此事之必然者也。雖欲爲國民之嚮導。然獨行百無與從。雖欲爲國民之前鋒。然深入而無以繼。故從事革命者。於破壞敵人之勢力之外。不能不兼注意國民建設能力之養成。此革命方略之所以爲必要也。余之革命方略。規定革命進行之時期爲三。第一爲軍政時期。第二爲訓政時期。第三爲憲政時期。第一爲破壞時期。在此時期內。施行軍法。以革命軍擔任打破滿洲之專制。掃除官僚之腐敗。改革風俗之惡習等。第二爲過渡時期。在此時期內。施行約法。（非現行者）。建設地方自治。促進民權發達。以一縣爲自治單位。每縣於散兵驅除戰事停止之日。立頒約法。以規定人民之權利義務與革命政府之統治權。以三年爲限。三年期

滿。則由人民選舉其縣官。或於三年之內。該縣自治局已能將其縣之積弊掃除。如上所述者。及能得過半數人民能了解三民主義。而歸順民國者。能將人口清查。戶籍釐定。警察。衛生。教育。道路。各事。照約法所定之低限程度而充分辦就者。亦可立行自選其縣官。而成完全之自治團體。革命政府之對於此自治團體祇能照約法所規定。而行其訓政之權。俟全國平定之後六年。各縣之已達完全自治者。皆得選代表一人。組織國民大會。以制定五權憲法。以五院制爲中央政府。一曰行政院。二曰立法院。三曰司法院。四曰考試院。五曰監察院。憲法制定之後。由各縣人民投票選舉總統。以組織行政院。選舉代議士。以組織立法院。其餘三院之院長。由總統得立法院之同意而委任之。但不對總統及立法院負責。而五院皆對於國民大會負責。各院人員失職。由監察院向國民大會彈劾之。而監察院人失職，則國民大會自行彈劾而罷黜之。國民大會職權。專司憲法之修改。及制裁公僕之失職。國民大會及五院職員。與夫全國大小官吏。其資格皆由考試院定之。此爲五權憲法。憲法制定。總統議員舉出後。革命政府當歸政於民選總統



。而訓政時期於以告終。第三爲建設完成時期。在此時期施以憲政。此時一縣之自治團體。當實行直接民權。人民對於本縣之政治。當有普通選舉之權。創制之權。複決之權。罷官之權。而對於一國政治。除選舉權之外。其餘之同等權。則負託於國家大會之代表以行之。此憲政時期。卽建設告竣之時。而革命成功之日也。革命方略大要如此。果能循此行之。則不但專制餘毒。滌除淨盡。國民權利。完全確實，而國民建設之能力。亦必穩健而無虞。何致有政客之播弄。與軍人之橫行哉。故革命主義。必有待於革命方略。而後得以完全貫徹也。

### 三 革命之運動

余之從事革命。建主義以爲標的。定方略以爲歷程。集畢生之力以赴之。百折而不撓。求天下之仁人志士。同趨於一主義之下。以同致力。於是有立黨。求舉國之人民。共喻此主義。以身體而力行之。於是有宣傳。求此主義之實現。先破壞而後有建設。於是有起義。革命事業。千頭萬緒。不可殫述。要其犖犖在此三者。分述於左：

(一)立黨 乙酉以後。余所持革命主義。能相喻者。不過親友數人而已。士大夫方醉心功名利祿。唯所稱下流社會。反有三合會之組織。寓反清復明之思想於其中。雖時代湮遠。幾於數典忘祖。然苟與之言。猶較縉紳爲易入。故余先從聯絡會黨入手。甲午以後。赴檀島美洲。糾合華僑。創立興中會。此爲以革命主義立黨之始。然同志猶不過數十人耳。迄於庚子。以同志之努力。長江會黨及兩廣福建會黨。始併合於興中會。會員稍稍衆。然士林中人。爲數猶寥寥焉。庚子以後。滿洲之昏弱。日益暴露。外患日益亟。士夫憂時感憤負笈於歐美日本者日衆。而內地變法自強之潮流。亦遂澎湃而不可遏。於是士林中人。昔以革命爲大逆無道。去之若浼者。至是亦稍知動念矣。及乎乙巳。余重至歐洲。則其地之留學生。已多數贊成革命。余於是揭蔡生平所懷抱之三民主義五權憲法。以爲號召。而中國同盟會於以成。及重至日本東京。則留學生之加盟者。除甘肅一省未有留學生外。十七省皆與焉。自是以後。中國同盟會遂爲中國革命之中樞。分設支部於外國各處。尤以美洲及南洋爲盛。而國內各省。亦由會員分往。祕密組織機關部

。於是同盟會之會員。凡學界工界商界軍人政客會黨無不同趨於一主義之下。以各致其力。迄於辛亥。無形之心力且勿論。會員爲主義而流之血。殆遍霑灑於神州矣。

(二)宣傳 余於乙未舉事廣州。不幸而敗。後數年。始命陳少白創中國報於香港。以鼓吹革命。庚子以後。革命宣傳驟盛。東京則有戡元成沈虬齋張溥泉等發起國民報。上海則有章太炎吳稚暉鄒容等。借蘇報以主張革命。鄒容之革命軍。章太炎之駁康有爲書。尤以一時傳誦。同時國內外出版物爲革命之鼓吹者。指不勝屈。人心士氣。於以丕變。及同盟會成立。命胡漢民汪精衛陳天華等撰述民報。章太炎旣出獄。復延入焉。民報成立。一方爲同盟會之喉舌。以宣傳正義。一方則力闢當時保皇黨勸告開明專制要求立憲之謬說。使革命主義。如日中天。由是各處支部。以同一目的。發行雜誌日報書籍。且以小冊祕密輸送於內地。以傳播思想。學校之內。市肆之間。爭相傳寫。清廷雖有嚴禁。未如之何。

(三)起義 乙未之秋。余集同志舉事於廣州。不克。陸皓東死之。被株連而死者。有

丘四朱貴全二人。被捕者七十餘人。廣東水師統帶程奎光與焉。遂瘦死獄中。此爲中國革命軍舉義之始。庚子再舉事於惠州。所向皆捷。遂佔領新安大鵬至在惠州平海一帶庚海之地。有衆萬餘人。鄭士良率之。以接濟不至而敗。同時史堅如在廣州。以炸藥攻燬兩廣總督德壽之署。謀殲其衆。事敗。被執遇害。自後革命風潮。遂由廣東及於全國。湘南黃克強馬福益之舉事。其最著者也。及同盟會成立之翌年。歲次丙午。會員舉事於萍鄉醴陵。於是革命軍起。連年不絕。其直接受余之命令以舉事者。則有潮州黃岡之役。惠州之役。欽廉之役。鎮南關之役。欽廉上思之役。雲南河口之役。蓋丁未戊申兩歲之間。舉事六次。前仆後繼。意氣彌厲。革命黨之志節與能力。遂漸爲國人所重者。而徐錫麟秋瑾熊成基之舉事於長江。亦與兩廣同相輝映焉。其奮不顧身以褫執政之魄。則有劉思復之擊李準。吳樾之擊五大臣。徐錫麟之擊恩銘。熊成基之擊戴洵。汪精衛黃復生等之擊攝政王。溫生才之擊孚琦。陳敬嶽林冠慈之擊李準。李沛基等之擊鳳山。其身或死或不死。其事或成或不成。然意氣所激發。不特敵人爲之膽落。亦足使天下頑夫廉

。儒夫有立志矣。事勢相接。庚戌之歲。革命軍再挫於廣州。至辛亥三月廿九日。黃克強率同志襲兩廣督署。死事者七十二人。皆國之俊良也。革命黨之氣勢。遂昭著於世界。是年八月。武昌革命軍起。而革命之功。於以告成。縱計諸役。革命黨人以一往直前之氣。忘身殉國。其慷慨助餉。多爲華僑。熱心宣傳。多爲學生。衝鋒破敵。則在軍隊與會黨。踔厲奮發。各盡所能。有此成功。非偶然也。以上三者。爲其犖犖大者。他若外之周旋。清陰謀之破壞。惟所聞非細。不能盡錄。留以待諸修史。

#### 四 辛亥之役

辛亥八月十九日。革命軍起義於武昌。擁黎元洪爲都督。各省革命黨人。不約而同。紛起以應。數日之內。光復行省十有五。遂於南京組織臨時政府。舉余爲臨時大總統。清廷命袁世凱。與臨時政府議和。遂使清帝退位。民國統一。余乃辭職。推荐袁世凱於參議院。繼任臨時大總統焉。此一役也。爲中國之大事。其得失利害。實影響於以後全體國民之禍福。不可以不深論也。

此役所得之結果。一爲蕩滌二百六十餘年之恥辱。使國內諸民族一切平等。無復輒轢凌制之象。二爲剷除四千餘年君王專制之迹。使民主政治。於以開始。自經此役。中國民族獨立之性質與能力屹然於世界。不可搖動。自經此役。中國民主政治。已爲國人所公認。此後復辟帝制諸幻想。皆爲得罪於國人而不能存在。此其結果之偉大。洵足於中國歷史上。大書特書。而百世皆蒙其利者也。

然以此役。遂足以現中華民國之實乎？則大謬不然，於何證之。以十二年來之已事證之。十二年來。所以有民國之名。而無民國之實者。皆此役階之厲也。舉世之人。方疾首蹙額。以求其原因而不可得。余請以簡單之一語。而說明之。曰。此不行革命方略之過也。革命方略。前已言之。規定革命進行之時期爲三。第一軍政時期。第二訓政時期。第三憲政時期。此爲蕩滌舊污。促其新治。所必要之歷程。不容一缺者也。民國之所以得爲民國。胥賴於此。不幸辛亥革命之役，忽視革命方略。置而不議。格而不行。於是根本錯誤，枝節橫生。民國遂無所恃以爲進行。此真爲大可悲痛者也。今舉其害如左：

(一)由軍政時期一蹴而至憲政時期。絕不予革命政府以訓練人民之時間。又絕不予人民以養成自治能力之時間。於是第一流弊。在舊污未由蕩滌。新治未由進行。第二流弊。在粉飾舊污。此爲新治。第三流弊。由發揚舊污。壓制新治。更端言之。卽第一民治不能實現。第二爲假民治之名行專制之實。第三則並民治之名而去之也。此所謂事有必至。理有固然者。

(二)軍政時期及訓政時期。最先注重者。在以縣爲自治單位。蓋必如是。然後民權有所託始。主權在民之規定。便不至成爲空文也。今於此忽之。其流弊遂不可勝言。第一以縣爲自治單位。所以移官治於民治也。今既不行。則中央及省。仍保其官治狀態。專制舊習。何由打破。第二。事之最切於於人民者。莫如一縣以內之事。縣自治尙未經訓練。對於中央及省。何怪其茫昧津涯。第三。人口清查。戶籍厘定。皆縣自治最先之務。此事已辦。然後可以言選舉。今先後顛倒。則所謂選舉。適爲劣紳土豪之求官捷徑。無怪選舉舞弊。所在皆是。第四。人民有縣自治以爲憑藉。則進而參與國事。可以綽綽

然有餘裕。與分子構成團體之學理。乃不相違。苟不如是。則人民失其參與國事之根據。無怪國事操縱於武人及官僚之手。以上四者。情勢顯然。臨時約法。已知規定人民權利義務。而於地方制度。付之闕如。徒沾沾於國家機關。此所謂合九州之鐵。鑄成大錯者也。

(三) 訓政時期 先縣自治之成立。而後國家機關之成立。臨時約法。適得其反。其謬已不可救矣。然即以國家機關之規定論之。惟知襲取歐美分立之制。且以爲付重權於國會。即符主權在民之旨。曾不知國會與人民。實非同物。况無以矯選舉之弊。無糾察機關。又無以分國會之權。馴至國會分子。良莠不齊。薰蕕同器。政府患國會權。非劫以暴力。視爲魚肉。即濟以詐術。弄爲傀儡。政治無明清之望。國家無鞏固之時。且大亂易作。不可收拾。

以上所述。皆十二年之擾攘情狀。人人所共見共聞者。尋其本原。何莫非不行革命方略。有以致之。余於臨時大總統任內。見革命方略。格而不行。遂不惜辭職。非得已也。



## 五 討袁之役

辛亥之役。以不行革命方略。遂致革命主義無由貫徹。已如上述。在此情況之中。使當政府之局者。爲忠於民國之人。亦無由致治。僅可得小康而已。余於袁世凱之繼任爲大總統也。固嘗以小康期之。乃倡率同志。退爲在野黨。並自任經營鐵路業案。蓋以爲但使國無大故。則社會進步。亦足以間接使政治基礎。臻於完固。如此。則民國之建設。雖稍遲滯。猶無礙也。顧袁世凱之所爲。無一不與民國爲仇。其不軌之心。日甚一日。袁世凱之出此。天性惡戾。反覆無常。固其一端。然所以敢於爲此者。一由革命方略不行。則緣之而生之弊害。絕不能免。人見弊害如此。則執以爲黨人詬病。謂民主之制。不適於中國。而黨人亦因失其信用。一由專制之毒深入人心。習於舊污者。視民主政治爲仇讎。伺瑕抵隙。思中傷之以爲快。羣趨重於袁世凱。將挾以爲推翻民國之具。而袁世凱亦利用之。以自便其私。積此二者。袁世凱於是有剷除南方黨人勢力根據之計劃。有推倒民主恢復帝制之決心。於狙殺宋教仁。小試其端。於五國借款。不經國會通過。更

張其燄。東南討袁軍舉事太遲。反爲所噬。辛亥之役。革命軍所植於國內之勢力。遂以爲蕩滌無餘。及乎國會解散。約法毀棄。則反形已具。帝制自爲之心事。躍然如見矣。余乃組織中華革命黨。恢復民國以前革命黨之面目。而加以嚴格之訓練。以辛亥復轍。申做黨人。俾於革命之進行。不致徬徨歧路。自二年至於五年之間。與袁世凱奮鬥不絕。及乎洪憲宣佈。僭竊已成。蔡鐸之師。崛起雲南。西南響應。而袁世凱窮途末路。衆叛親離。卒鬱鬱以死。民國之名。乃得絕而復蘇。

經此一役。奈以爲國人應有之覺悟。其至低限度。亦當知袁世凱式之政治。不能治在於民國之內。必澈底以剷除之也。期國人之意識。乃無異於辛亥。辛亥之役。以爲在使清帝退位。則民國告成。謳歌太平。坐待共和幸福之降臨。此外無復餘事。所有民國一切之設施。與舊制度之更張。不特不以爲必要。且以爲多事。丙辰之役。以爲但保袁世凱取消帝制。則民國依然無恙。其他袁世凱所留之制度。不妨蕭規而曹隨。似袁世凱所爲。除帝制外。無不宜於民國者。甚至袁世凱所毀之約法。與所解散之國會。亦須力爭。

而後得以恢復。其他更無待言。故辛亥之結果。清帝退位而止。丙辰之結果。袁世凱取消帝制而止。

## 六 護法之役

自民國二年至於五年。國內之革命戰事。可統名之曰討袁之役。至五年至於今。國內之革命戰事。可統名之曰護法之役。袁世凱雖死。而袁世凱所遺留之制度。不隨以俱死。則民國之變亂。正無已時。已爲常人意料所及。果也。曾不期年。而毀棄約法解散國會之禍再發。馴至廢帝復辟。民國不絕如縷。復辟之變。雖旬餘而定。而毀法之變則愈演愈烈。余乃不得不以護法號召天下。

夫余對於臨時約法之不滿。已如前述。則余對於此與革命方略相背馳之約法。又何爲起而擁護之。此必讀者所亟欲問者也。余請鄭重以說明之。辛亥之役。余格於羣議。不獲執革命方略而見之實行。而北方將士。以袁世凱爲首領。與余議和。夫北方將士與革命軍相距於漢陽。明明爲反對國民者。今雖曰服從民國。安能保其心之無他。故余奉臨時

約法而使之服從。蓋以服從臨時約法爲服從民國之證據，余猶慮其不足信，故必令袁世凱宣誓遵守約法。矢忠不貳。然後許其和議。故臨時約法者。南北統一之條件。而民國所由構成也。袁世凱毀棄臨時約法。卽爲違背誓言。取消其服從民國之證據。不必待其帝制自爲。已爲民國所必不容。袁世凱死。而其所部將士。襲其故智。以取消其服從民國之證據。則其罪與袁世凱等。亦爲民國所必不容。故擁護約法。卽所以擁護民國。使國人對於民國。無有異志也。余爲民國前途計。一方面甚望有更進步更適宜之憲法。以代臨時約法。一方面則務擁護臨時約法之尊嚴。俾國本不因以搖撼。故余自六年至今。奮然以一身荷護法之大任而不少撓。

護法事業。凡三波折。六年之秋。余率海軍艦隊。南去廣州。國會開非常會議。舉余爲大元帥。余乃以護法號令西南。西南將帥。雖有陰持兩端不受約束者。然於護法之名義。則崇奉不敢有異。故其時西南與北方戰，純然護法與非法戰也。及余解職去廣州。繼起之軍政府。對於護法。不能堅持。而西南諸省。因之亦生攜貳。卒至軍政府有悍然取

消護法之舉。於是護法事業。幾于墮地。九年之冬，余重至廣州，翌年五月。再被選爲大總統。始重整護法之旗鼓。以北嚮中原。而奸宄竊發。進行蹉跌。北方將士。反以護法相號召。冀收統一之效。余固喜之。願以國會問題。猶未解決。護法事業。終爲有憾。然余甚願以和平方法。視護法之完全告成也。護法之戰。前後六載。國家損失。不爲不重。人民犧牲。不爲不大。軍興既久。所在以養兵爲地方患。故余於護法事業將告結束之際。發起化兵爲工之主張以補救之。如實行此主張。於國利民福。當有所裨。否則護法之役，所得效果。惟留法不可毀之一念於國人腦中而已。較辛亥丙辰所得結果。不能有加也。

## 七 結論

中華革命之經過。其艱難頓挫如此。據現在以策將來。可以一結論曰。非行化兵爲工之策。不能解目前之糾紛。非行以縣爲自治單位之策。不能奠民國於苞桑。願我國人。一念斯言。

民國十二年一月二十九日

# 附

## 年譜

一歲 西歷一八六六。民元前四六年。(清同治五年丙寅)

以是年陰歷十月初六日寅時誕生於廣東香山縣翠亨村。父諱道川。母楊氏。其時正鴉片戰役後二十六年。英法聯軍入京後六年。洪楊被滅後三年。

二歲 西歷一八六七。民元前四五年。(清同治六年丁卯)

三歲 西歷一八六八。民元前四四年。(清同治七年戊辰)

四歲 西歷一八六九。民元前四三年。(清同治八年己巳)

五歲 西歷一八七〇。民元前四二年。(清同治九年庚午)

是年普法戰爭。法國共和成立。

六歲 西歷一八七一年。民元前四一。(清同治十年辛未)

七歲 西歷一八七二。民元前四〇。(清同治十一年壬申)

八歲 西歷一八七三。民元前三九。(清同治十二年癸酉)

九歲 西歷一八七四。民元前三八。(清同治十三年甲戌)

十歲 西歷一八七五。民元前三七。(清光緒元年乙亥)

十一歲 西歷一八七六。民元前三六年。(清光緒二年丙子)

十二歲 西歷一八七七。民元前三五年。(清光緒三年丁丑)

以上數年在翠亨廟塾內讀書。其時清廷派遣留學生於英法。

十三歲 西歷一八七八。民元前三四年。(清光緒四年戊寅)

聞太平天國某老遺兵講洪楊故事。卽以洪秀全第二自許。革命動機。於是萌芽。是年左宗棠平新疆。

十四歲 西歷一八七九。民元前三三年。(清光緒五年己卯)

隨其兄眉(德彰)赴夏威夷(卽檀香山)入耶教學校。是年日本取琉球。

十五歲 西歷一八八〇。民元前三二年。（清光緒六年庚辰）

仍在耶教學校肄業。清廷遣曾紀澤往俄求還伊犁。

十六歲 西歷一八八一。民元前三一年。（清光緒七年辛巳）

在夏威夷耶教學校畢業。後助其兄經營商業半年。又入聖路易學校肄業一學期。是年伊犁條約成。

十七歲 西歷一八八二。民元前三〇年。（清光緒八年壬午）

自火奴魯魯（檀島巨埠）回里。家居一年。向村民宣傳清廷腐敗。

十八歲 西歷一八八三。民元前二九年。（清光緒九年癸未）

因瀆神被迫離鄉。至香港入皇家學校。

十九歲 西歷一八八四。民元前二八年。（清光緒十年甲申）

仍在香港。於中法戰爭。喚醒僑民於迷夢。四月十三日與盧夫人結婚。

二十歲 西歷一八八五。民元前二七年。（清光緒十一年乙酉）



是年已在皇家學校畢業。時中法戰敗。清廷與法議和。訂越南新約十條。目擊國事日非。乃決傾覆清廷創建民國之志。遂擬定學習醫業。以爲將來入世之媒。作長時期從事革命之護身符。於是入廣州博濟醫學校。在校識三合會首領鄭士良。組織秘密革命機關。輸革命思想於草野豪傑。又識陳少白。尤少紈。楊鶴齡。陸皓東。昕夕談革命。陳光楊徐。港澳間親友。呼爲四大寇。

二十一歲 西歷一八八六。民元前二六年。(清光緒十二年丙戌)  
仍在博濟醫學校。是年英吞甸緬。清廷置台灣省。

二十二歲 西歷一八八七。民元前二五年。(清光緒十三年丁亥)  
爲革命活動便利起見。轉入香港醫學校。往來香港澳門。鼓吹革命。是年清廷與國續訂界務專約五款。商務專約十款。

二十三歲 西歷一八八八。民元前二四年。(清光緒十四年戊子)  
仍肄業香港醫學校。照常活動。是年英兵與西藏兵交綏，藏兵敗。

二十四歲 西歷一八八九。民元前二三年。(清光緒十五年己丑)

同上。是年清廷立皇后。那拉氏太后歸政。

二十五歲 西歷一八九〇。民元前二二年。(清光緒十六年庚寅)

同上。是年清廷與英訂藏印條約。烟台條約。開重慶爲商埠。

二十六歲 西歷一八九一。民元前二一年。(清光緒十七年辛卯)

同上。是年清廷立北洋海軍。

二十七歲 西歷一八九二。民元前二〇年。(清光緒十八年壬辰)

在香港醫學校畢業。設醫局於廣州澳門。開始革命運動。令鄭士良結納會黨。聯絡

防營。是年雲南探夷滋事。清廷派兵剿平。

二十八歲 西歷一八九三。民元前一九年。(清光緒十九年癸巳)

偕陸皓東北上至京師。窺清廷虛實。是年直隸妖匪滋事。清廷派兵剿平。

二十九歲 西歷一八九四。民元前一八年。(清光緒二十年甲午)

時中日宣戰。先生以爲時機可乘。乃赴檀島美洲。出洋後自郵上書相國李鴻章。建議富國強兵之遠略。以人盡其才。地盡其利。物盡其用。貨暢其流爲綱要。（原書見第四集書牘函電）又創立興中會向華僑募集捐款，時人心錮塞。僅得鄧蔭南與胞兄德彰願傾家相助。及其他親友數十人之贊同。是年中日戰爭。中國海陸軍敗績。

三十歲 西歷一八九五。民元前一七年。（清光緒二十一年乙未）

與鄧蔭南等回國。欲襲返取廣州以爲根據。遂開乾亨行於香港爲幹部。設農學會於廣州。命鄧蔭南陸皓東等分主其事。先生則往來兩地。九月九日因運械不慎。致被海關搜獲槍六百餘桿。事敗垂成。陸皓東與丘四朱貴全死之。此爲第一次革命之失敗。事敗後十餘日。先生乃得由廣州問道至香港。隨與鄧士良渡日本橫濱。旋斷髮改裝。重遊檀島。推廣興中會。是年台灣宣告自立。日本先後取台南台北。台灣亡。

三十一歲 西歷一八九六。民元前一六年。（清光緒二十二年丙申）

再赴檀香山往美洲。推廣興中會。鼓吹華僑贊助革命。大遭清廷之忌。時華僑歡迎

革命者尙少。仍赴英。爲駐英公使龔照瑗誘拘於使館。幸先生得侍者持密書請其師康德黎營救。始脫於險。釋出後客居英倫。

三十二歲 西歷一八九七年。民元前一五年（清光緒二十三年丁酉）

仍居倫敦。時游歐洲各國。是年德取膠州灣。康有爲清廷變法圖強。

三十三歲 西歷一八九八年。民元前一四年。（清光緒二十四年戊戌）

考察歐洲政治風俗。甚有心得。乃確定三民主義主張。以爲革命時解決民族民權民生之標準。代菲列濱獨立黨首領買子彈五萬發。中途被沉。後又代買三萬發。是年光緒信任康梁銳意變法。那拉太后復聽政。廢新法。殺保皇黨人。

三十四歲 西歷一八九九年。民元前一三年。（清光緒二十五年己亥）

由歐洲往日本。日本民黨領袖犬養毅遣宮崎寅藏等。迎於橫濱。相見甚歡。又與在野之志士交好。諸志士且資助之。派陳少白。史堅如。鄭士良等至香港長江等處活動。並刊中國日報。長江閩粵之會黨皆合於興中會。其時日本雖有華僑數萬人。附

和排滿革命之說者。祇得百數十人。是年因廣州法兵官爲匪所戕。訂廣州灣租界約七條。

三十五歲 西歷一九〇〇。民元前十二年。（清光緒二十六年庚子）

秋間北方義和團起後。先生擬入粵舉事。至香港不得登岸。謀從台灣趨惠州。亦不可得。時所派鄭士良在惠州稱兵。初甚得手。卽惠州有名之大發動也。後以無援而敗。日本山田良政等殉焉。而青天白日旗之飄搖空際。蓋自此始。史堅如在廣州謀用炸藥攻毀兩廣總督德壽之署。炸發不中。被擒。爲南海縣官裴景福所殺。（第二次失敗）是年拳匪之亂。聯軍入京。太后挾光緒奔西安。唐才常在武昌舉事。秦力山在安徽大通響應。均不成。

三十六歲 西歷一九〇一。民元前一年（清光緒二十七年辛丑）

在日本宣傳主義。募集基金。是時人民已更變昔時詛咒謾罵之態度。鮮聞以惡聲相加者。與保皇黨梁啟超相遇。談論天下大事。勸其贊成革命。卒以梁氏受清室知遇

。不聽。是年清廷與八國聯軍和議成。賠款四百五十兆兩。

三十七歲 西歷一九〇二。民元前一〇年。（清光緒二十八年壬寅）

在日本。是年上海南洋公學學生全體罷學。創立愛國學社。

三十八歲 西歷一九〇三。民元前九年。（清光緒二十九年癸卯）

自日本往安南。是年正月上海愛國學社教員學生在張園演說革命。革命志士在蘇報

鼓吹革命。

三十九歲 西歷一九〇四。民元前八年。（清光緒三十年甲辰）

又從安南去日本。旋赴檀島美洲鼓吹革命。漸受感動。蹤跡所至。莫不歡迎。是年

黃克強馬福益在湘舉義。李紀堂洪全福在粵舉義。均失敗。馬福益被殺。清廷與英

訂藏印條約。

四十歲 西歷一九〇五年。民元前七年（清光緒三十一年乙巳）

是時留學生受革命思潮之陶冶。已由言論而至實行。春間重至歐洲。揭三民主義五

權憲法號召同志。組織團體。開第一會於北京。加盟者三十餘人。開第二會於柏林。加盟者二十餘人。開第三會於巴黎。加盟者亦十餘人。夏由美去日本。秋間開第四會於東京富見士樓。加盟者數百人。十七省之人皆與焉。卽空前之同盟會也。先生自是始信革命大業。可及身而成矣。乃與宋漁父黃克強擬定黨綱六條發布如左。

(一) 推翻滿清政府。

(二) 建設共和民國。

(三) 維持世界真正和平。

(四) 主張土地國有。

(五) 主張中日兩國國民的聯合。

(六) 要求世界列邦贊成中國革命事業。

其總括之口號爲四。卽

(一) 驅除韃虜……民族主義

(二) 恢復中華……民族主義

(三) 建立民國……民權主義

(四) 平均地權……民生主義

是年派黨員赴內地各省調查。胡漢民汪精衛等在東京發刊民報。鼓吹主義。清廷遣戴澧等考察各國憲政。

四十一歲 西歷一九〇六。民元前六年。(清光緒三十二年丙午)

賴同盟會鼓吹之力。國內加入同盟者萬餘人。且有萍醴之役。劉道一等死之。清廷益懼。乃要求日本驅逐先生。先生乃偕汪胡等往安南。是年清廷諭預備立憲。

四十二歲 西歷一九〇七年。民元前五年。(清光緒三十三年丁未)

先生抵安南後。設機關於河內。籌畫進行。旋發動潮州黃岡之師不得利。(第三次失敗) 同年四月命鄧子瑜發難於惠州又失敗。(第四次失敗) 七月欽廉兩府發生抗捐事。清廷遣郭人彰趙伯先各率兵三四千往平之。先生在安南招集同志。擬乘機占



領防城一帶。派黃克強胡毅生暗結郭趙爲內應。派萱野長知帶款回日本購械。七月革命軍破防城。本可進取兩粵。不料東京本部黨員忽起風潮。購買運輸武器之計畫破壞。郭趙又失約。全軍遂敗退十萬大山。（第五次失敗）先生又親率黃克強胡漢民及同志百餘人襲取鎮南關。占領三要塞。握據三砲臺。與龍濟光陸榮廷等數千人連戰七晝夜。乃退入安南。（第六次失敗）先生亦被法政府放逐。退往星洲。先生於離河內之際。命克強籌備再入欽廉。克強乃以二百餘人。橫行於欽廉上思一帶。轉戰數月。所向無前。後以彈盡援絕而退。（第七次失敗）是年徐錫麟刺恩銘。

四十三歲 西歷一九〇八。民元前四年（清光緒三十四年戊申）

黃明堂奉命襲取河口。誅邊防督辦。收其降衆千有餘人。先生命克強前往指揮。中途爲法官所執。指揮無人。失機進取。乃率六百餘人退出安南。（第八次失敗）先生以連遭失敗。安南日本香港等處。均不能居住。乃漫遊美洲。專學籌款。以一切計畫交胡漢民黃克強。是年光緒崩。醇親皇攝政。溥儀登位年號宣統。

四十四歲 西歷一九〇九。民元前三年（清宣統元年己酉）

在美國。是年清廷與日訂圖們江中韓條約。

四十五歲 西歷一九一〇。民元前二年。（清宣統二年庚戌）

黃克強胡展堂等謀以廣州新軍於正月某日舉事。中有熱度過甚者。先一日因事起風潮。倪映典倉卒入營。率軍由沙河進攻省城。爲敵截殺。軍中無主。遂以潰散。（第九次失敗）先生聞敗後。由美取道檀島而返。過日本時。潛行登陸。爲日警探悉。不許留。遂渡檳榔嶼。約趙伯先黃胡來晤。商量重起計畫。衆有憂色。相視無言。先生勗勉再四。並招集當地華僑會議以集資金。一夕得八千有奇。數日之內。分頭勸募五六萬元。先生又親赴南洋英荷各屬及暹邏。所至輒受拘束。先生乃赴美洲。是年二月汪精衛刺攝政王不中被獲。

四十六歲 西歷一九一一。民元前二年。（清宣統三年辛亥）

陰歷三月二十九日趙聲黃克強等在廣州舉事。死者七十二人。皆各省革命黨之精英

事後叢葬於黃花岡。是爲先生與清虜奮鬥最後一次之失敗。自黃花岡一役後。清廷大懼。各省疆吏盡入恐慌之地。武漢新軍孫武劉公等踴躍欲動。忽而機關破獲。黨員被捕三十餘人。名册被搜獲。同志熊秉坤蔡濟民等揭先生之名而起義。各省同志。各自爲戰。紛起響應。不數月光復十五省。先生在美聞耗。決意致力外交。以斷清廷外援。首至英國。阻止清廷向四國銀行之借款二萬萬元。復請制止日本援助清廷與取消放逐令。以便回國。各事就緒。乃由法東歸。

四十七歲 西歷一九一二。民國元年。(壬子)

先是各省代表。於去年陰歷十一月開會議於南京。選舉臨時大總統。共十七票。先生以十六票當選。遂於是年陽歷一月一日在南京就職。並布告全國改用陽歷。是年二月十二日清帝溥儀退位。次日先生提出辭職書於參議院。讓政權於袁世凱。先生乃周遊各省。宣傳主義。擬專從事實業教育。旋任全國鐵路督辦。宋教仁等因欲擴大黨勢。改同盟會爲國民黨。黨員加多。而黨綱與效率均較前退化。

四十八歲 西歷一九一三。民國二年。(癸丑)

袁世凱使人暗殺宋教仁。參衆兩院組織選舉會舉袁世凱爲大總統。黎元洪爲副總統。袁氏並借善後大借款二千五百萬磅。先生命黃克強李烈鈞等起討袁義師。不成。

乃東赴日本。鑒於國民黨之大而無當。乃集合革命份子。另組中華革命黨。

四十九歲 西歷一九一四。民國三年。(甲寅)

先生與宋夫人在日本結婚。

五十歲 西歷一九一五。民國四年。(乙卯)

是年歐戰爆發。日本向我國提出二十一條。袁世凱欲帝制自爲。甘心賣國。先生乃命同志回國乘機舉事。廣東湖南等處黨人之被龍濟光湯蕪銘屠殺者以萬計。及秋間籌安會起。先生亟命李烈鈞赴滇。居覺生赴魯。朱執信陳炯明回粵。黃克強程潛回湘。于右任回陝。分途舉兵討袁。及雲南事起。李烈鈞與蔡松坡分任軍長。各省紛紛響應。皆先生預定之計劃也。

五十一歲 西歷一九一六。民國五年。(丙辰)

袁氏宣布帝制。改元洪憲。爪牙遍國中。全國懾服於威力之下。敢怒不敢言。蔡松坡先生自京潛入雲南。振臂一呼。義旗四起。時公在日本宣告討袁。友邦共喻。袁氏卒以各省反對。布告取消帝制。旋病死。

五十二歲 西歷一九一七。民國六年。(丁巳)

重返廣州。組織軍政府。是年五月。倪嗣冲糾合督軍團造反。張勳換黎元洪解散國會。旋擁廢帝宣統復辟。爲段祺瑞等討平。先生命程璧光率海軍至粵。宣言護法。八月國會議員自行集會於廣州。開非常會議。制定軍政府大綱。選舉先生爲軍政府陸海軍大元帥。九月命湖南零陵鎮守使劉建藩率兵北伐。是年蘇俄革命。

五十三歲 西歷一九一八。民國七年(戊午)

五月一日。先生向非常國會辭去大元帥職。同月。非常國會修正軍政府大綱。選先生爲軍政府七總裁之一。是年北京政府召集非法國會(安福國會)選舉徐世昌爲非

法總統。

五十四歲 西歷一九一九。民國八年。(己未)

是年歐戰和議。青島問題哄動全國。北京學生首先反對日本帝國主義及安福部賣國賊曹陸章等。各地學生罷課。商界罷市。要求解散安福俱樂部罷免曹陸章。發生空前之五四運動。先生以廣州軍政府爲桂系軍閥把持。不能合作。乃向非常國會辭職。率戴季陶朱執信等赴滬。辦理建設雜誌。並從事著作。草建國方略。創行易知難之說。以喚醒民衆。繼續從事革命。

五十五歲 西歷一九二〇。民國九年(庚申)

廣州軍政府總裁岑春煊陸榮廷與廣東督軍莫榮新等。投降徐世昌。取消自主。先生命許崇智陳炯明率兵驅逐之。岑走滬。陸莫遁桂。先生被粵省軍民歡迎回粵主持。十二月一日在廣州與伍廷芳唐紹儀唐繼堯等重開政務會議。繼續革命事業。是年北方有直皖之戰。

五十六歲 西歷一九二一。民國一〇年。(辛酉)

四月七日廣東國會選舉先生爲大總統。於五月五日在廣州就職。訂是日爲雙五節。命葉舉等援桂驅逐陸氏。十月。親率大軍由廣西北伐。蘇俄遣代表馬林由粵轉桂與先生會晤。

五十七歲 西歷一九二二。民國十一年。(壬戌)

先生原定由廣西北伐計劃。以陳炯明陰萌叛志。不肯接濟軍需。乃於四月率師返粵。命李烈鈞許崇智進攻江西。免陳炯明本兼各職。六月十六日陳炯明嗾使部下葉舉等圍攻總統府。先生避居永豐艦。率海軍永豐永翔廣玉豫章楚豫等艦於酷暑蒸熱中。與陳逆相持於白鵝潭者月餘。並電召入贛之許崇智軍回粵肅清內亂。不利。乃於八月九日離粵赴滬。而數年心血所成之著作悉被陳燬盡。是年四月直奉之戰發生。直系軍閥勝。逐徐世昌。迎黎元洪入京。黎於六月十一日復就所謂總統職。恢復舊國會。先後派黎樹等迎先生北上。先生以封建勢力並未剷除。革命仍未成功。拒絕

其請。於八月十五日發表宣言。大意謂。(一)合法國會當自由集會行使職權。(二)懲治禍首。(三)實施兵工計劃。(四)發展實業改善民生計。(五)實行全民政治。不容軍閥假託割據等數端。

五十八歲 西歷一九二三、民國一二年。(癸亥)

先生命滇軍楊希閔桂軍劉震寰等由廣西舉兵討陳。先生乃於二月重蒞廣州。各軍公推爲大元帥。六月先生命譚延闓率兵返湘。聲討趙吳。不成。

五十九歲 西歷一九二四。民國一三年。(甲子)

一月在廣州召集全國國民黨代表大會。全部改組。發布國民黨宣言制定建國大綱。創設黨立軍官學校。先後講演三民主義十四次。成三民主義一書。秋聞江浙戰起。先生一面令許崇智率粵軍。蔣介石率學生軍。胡思舜率滇軍肅清東江。一面令譚延闓樊鍾秀等率湘豫各軍取道江西北伐。又命同志焦易堂等暗結胡笠僧馮煥章孫禹行等在北方舉事。北京政變。曹吳倒後。段祺瑞爲臨時執行。先生發布宣言。主張召



集國民會議以改善人民生計廢除不平等條約。十一月應國民軍及段祺瑞之請。毅然放棄廣州地盤北上互商國是。由滬繞道日本至津。在滬及日均有長篇講演。抵津時肝疾即發。乃入京治療。

六十歲 西歷一九二五。民國一四年。(乙丑)

先生素有肝疾。以積勞成瘕。中西醫束手。遂於三月十二日午前九時半卒於北京鐵獅子胡同行轅。遺囑同志繼續努力。四月二日殯於北京西山之碧雲寺。黨人組織葬事籌備會。徵求陵墓圖案。(呂彥直當選) 遵遺命將以國民葬禮葬先生於南京紫金山。

附

## 著作及講演紀錄要目

一 革命方略 此係中國革命同盟會時代先生所著。就性質言。可視為『建國大綱』之

初稿者也。兩相比較。先生之進步。真無量矣。此書關於軍政。訓政。憲政時代之劃分。言之甚詳。而民國建國之大綱。亦略具規模。欲究中華民國之淵源。不可不讀也。民國三年中華革命黨刊行之革命方略。係同人雜湊而成。先生之政見探入甚少。其價值比於舊革命方略。不但不及百一。且於革命之理論實際。皆無所發明。其時余亦爲編輯者之一。至今思之。惶悚萬狀。吾輩以無學之故。不能助先生成大業。而國民亦受累不淺。此罪何可道哉。後之從事於革命事業者。共以吾輩爲戒。而以先生之博學審問慎思明辯爲法。則國家前途受福無量矣。

二 建國大綱 此爲先生創作之大成。四十年之學問功行。盡備於此矣。

三 孫文學說 此爲先生之哲學的創作。量重要之文字也。

四 實業計畫 此爲先生數十年苦心研究實際問題之成績。

五 民權初步 先生之著書。此爲第一部。卽名思義。國民應有所覺第矣。

六 民族主義民權主義民生主義 關於民生主義。只成四講。在未講之目錄中。尙有住

居。養生。送死。及民生主義給論。三民主義結論諸篇。惜無遺稿。孫夫人云。曾聞先生述其大概。嗟乎後之學者。誰復能繼此哉。

七 軍人精神教育 此書可作先生之倫理哲學觀。實國民教育之基本原理。其價值不僅在軍事教育也。

先生爲最能創造者。於此一依古訓。縱其大略。則『智仁勇三者。天下之達德也。所以行之者一也』。可以盡之。此先生所以爲繼往開來之大聖。而承中國之正統思想也。

八 中國國民黨第一次全國代表大會總理演說集。

九 孫先生演講集（中國國民黨中央執行委員會宣傳部刊行之國民叢刊第二集）

十 孫中山先生十講 軍人精神教育亦在內。但前數篇記錄。過於簡單。爲可惜耳。

十一 孫先生過日本時之言論 其中所收先生在神戶高等女學校及東方旅館之講演。爲先生最終之講演。前者述中國文化之道德的價值。後者說明中國之國家及民族境遇

。一則壯麗。一則悲哀。黃君紀錄。意義雖無遺漏。而演說之神情。則不能傳其什一。東方旅館之講演。聞者多揮淚。嗚呼。此真先生與世人告別之哀詞也。吾國民之責任深重矣。

十二 中國存亡問題 此文係朱執信先生筆述。以朱先生名義出版。英日文均有譯本。當出版時。捕房搜檢泰東書局。並欲捕朱先生。可見英人之恨此書也。執信文集未收入。余意確應入中山全集。俾研究中山先生之外交政策者。得最正確之觀念。知此者必同意也。（余所著東方問題與世界問題完全爲中山先生之意見可作參考材料）

十三 歷年之政治的宣言 此中以興中會宣言。同盟會宣言。民國六七年間關於時局之宣言（內有主張和平統一及兵工政策者最爲重要）廣東軍政府之對外宣言。及中國國民黨第一次代表大會宣言。十三年九月北伐宣言。十一月關於時局之宣言等。爲主要文字。雖非盡爲先生所著。然先生之思想及主張。於此可知其大體。不可忽視。

也。

以上所錄各種文字之外。尙有下數種，亦爲研究先生思想者不可不讀之文。

一 上李鴻章書 此爲研究先生少年時代政治思想之重要者。『人盡其材。地盡其利。物盡其用。貨暢其流』四語。實爲先生三民主義之主要目的。可見先生之思想學問。雖最近數年乃得完成。然其根本固已種於少年時代矣。

盛世危言中有先生著作兩篇。但忘其篇名。昨晤陳少白先生云。一篇關於農政。他一篇待考。

## 二 關於錢幣革命之通電（民國九年）

此爲先生經濟政策之主要文字。其價值不在主張平均地權下。且理論及辦法。均爲創作。當時先生曾詳述其意見。命傳賢等筆記。每日一二小時。約六七回。因余於先生之思想。是時毫無研究。故所記者不甚達意。惟此稿若存。亦未嘗不能爲追想之助。蓋此外無何等記錄。足爲研究此電文之參考也。

三 致犬養毅書 此文約二萬言。爲先生親自起稿。夫人手抄寄去。原稿現存夫人處。

此爲先生亞洲復興政策之大著。非尋常書翰可比。與朱執信先生所述之中國存亡問題合觀。發明正多。

四 民報序 此文爲先生口述。展堂先生筆記。可作研究三民主義之歷史的參考品。亦不失爲重要文字也。

五 爲星期評論申報新聞報所著之三論文 均先生自著者。所論頗涉及實際問題。不可不一讀也。

六 三十三年落花夢序 三十三年落花夢一書。爲日人宮崎寅藏先生所著。宮崎別號曰浪滔天。國人多知之者。書中述當時革命黨人活動事頗多。其關於中山先生者亦不少。有國文譯本。中山先生所著序。不滿二百字。然澄清天下爲民立之氣概。活躍紙上。欲知與國偉人壯年時代之抱負。不可不一讀也。

七 倫敦避難記 此書述在倫敦被使館拘留事。原文爲英文。有國文譯本。

余所知者止此。少白精衛展堂仲愷諸先生。從中山先生久者。所知必較多。應以所知者告諸公衆也。（聞少白先生處尚存中山先生少年及壯年時代之書翰甚多又日人菅原傳先生處有在檀島與中山筆談之記錄其他日本舊友處先生之書翰想亦不少如犬養木堂頭山立雲秋山定輔及已故之秋山頁之諸先生均與中山先生常有函扎之來往者他日刻中山先生之全集時宜徵求之也）此外先生之西文著作。當亦不少。亦有先生口述而他人筆記之者。陳友仁先生韋玉先生。及孫夫人。皆嘗佐先生作西文記錄。宜速將各種著作函扎。先列出目錄。盡力搜求。譯爲國文。俾先生之全集。得以完全無缺也。現存孫夫人處之講演記錄稿。尙未經先生審定付印者。約二十萬言。此稿不久當能由相當之同志細校。編輯成書矣。民國十四年四月十四日戴季陶記。